



## 擲雞酒

《孟子》書講：「不孝有三，無後為大」，自古早漢人傳統觀念即係重視一代傳過一代，香火个傳承。按文化和事正有人好傳落去。所以罵人个事內底，頭毒个即係「過毛絕代」咒識別儕絕子絕孫。相對个若降著一個囡子，即歡喜得天，報上報落報得逐儕知，食滿月紅卵，拜神明去還神。報喜方法在臺中東勢有做新丁版。在崙背羅屋莊嘛有一個擲雞酒个風俗。

俗語講「生會過燒酒香，生毋會過四埕枋。」係在講古早个夫娘人降細子个危險性，若堵著難產，連生命都會無去。若順產，即會用坐月內，家庭經濟好个即會加夫娘人補補个。用酒和肉落去共下煮煮係當時頭好个補品。所以還神去拜伯公，抑係感謝媒人攞用雞酒。在夫娘人有身个時，屋下底即愛量早供一、二十隻雞，等順序降細子了後即有雞好用。

羅屋莊有百外年擲雞酒个在地文化。在正月半辦這個活動。屋下出新丁个公姐子在正月半个時攞會擲一隻剛好个雞公和一罐酒去爐主屋下拜三界公和比雞大隻比賽。正結婚个公姐嘛擲雞酒來拜神明祈求保護。雞拜拜了後愛留落來，隨剝剝煮煮做雞酒得鄉親分享。毋過爐主會加雞頭、雞尾椎、雞腳、雞翼剝起來得主人撿轉去，兼送一罐水和兩粒柑子，代表吉利。這雞个四部分，在地人喊做「四點金」。這四點金代表全雞个意思，肉請人食，骨頭留得自家。像莊下人个樸實，加頭好个菜送人，較標个留得自家食共款。

拜神了後个雞，磅睭望哪儕个頭重，照頭等、貳等這兜等別來發獎金。著等个人歡喜，鄉親嘛替佢歡喜。在地人講：「四點金轉，得細子好供」，雞酒得鄉親大家食，得人「食福食平安」，在艱難个時代係一種送暖个人情世事。成過事講「好脛人剝肉，毋好脛人相打」，即這款意思。擲雞酒代表著報喜、感恩、分享个文化，在今日个臺灣尤其寶貴。

作者：李秉璋

### ☆詞彙學習☆

【過毛絕代】gooˊ moˊ ciedˊ toi：罵人斷子絕孫  
孤苦無依。

【咒識】zhiuˊ camˊ：詛咒，詛咒別人有所報應  
或有惡報。

【紅卵】fungˊ lonˊ：生男孩時，將水煮蛋染上紅色  
代表喜氣，分送親朋好友共享得子之喜悅。

【四埕枋】siˊ deuˊ biongˊ：喻棺材板，表示難產  
等著的就是死亡。

【坐月內】cooˊ ngiedˊ nui：坐月子，婦女生產  
完後需待在房內靜養一個月不得外出，且須  
進補休養身體。

【有身】rhiuˊ shinˊ：懷孕。

【量早】liong zooˊ：提早。

【公姐子】gungˊ ziaˊ zuˊ：夫妻。

【雞公】geˊ gungˊ：公雞，祭拜神明或特殊  
節慶，必須以公雞來祭拜。

【爐主】luˊ zhiˊ：村莊中有共同祭拜的神明，  
必須每年擲聖杯來決定主事者，即爐  
主，全權負責所有祭祀事宜。

【三界公】samˊ gaiˊ gungˊ：指道教中掌管  
天界、地界、水界三界的神明，天官、  
地官和水官。

【雞尾椎】geˊ muiˊ zuiˊ：雞屁股。

【雞翼】geˊ rhidˊ：雞翅膀。